

00000

- केन्द्रीय मंत्री अन्नपूर्णा देवी बाल विवाह मुक्त भारत बणावण सारू एक सौ दिन रा खास जागरुकता अभियान री सरूआत कीनी।
- मुख्यमंत्री भजनलाल शर्मा रो काल श्रीगंगानगर मांय फिरोज़पुर फीडर ने और बेहतर बणावण रा काम री सरूआत रो कार्यक्रम।
- देश मांय बिजली ऊं चालण वाळी गाड़ियां री बिक्री साल 2030 ताई 20 लाख करोड़ रुप्या ताई पूगण रा आसार।
- पांचवां खेलो इंडिया यूनिवर्सिटी गेम्स काल पूरा व्हेला।

0000

बाल विवाह मुक्त भारत बणावण सारू आज एक सौ दिन रो गहन जागरुकता अभियान सरू करी ज्यो। केंद्रीय महिला अर बाल विकास मंत्री अन्नपूर्णा देवी नई दिल्ली मांय इण री सरूआत कीनी। ओ अभियान बाल विवाह मुक्त भारत अभियान री पहली वर्षगांठ रा सिलसिला मांय चलायी ज्यो है। ई मौके अन्नपूर्णा देवी अर महिला अर बाल विकास राज्य मंत्री सावित्री ठाकुर मौजूद लोगां ने टाबर-टाबरियां रा बाळपणा मांय ब्याह नी करण री सौगंध दिरायी। ई अभियान रा तैत स्कूलां, कॉलेजां, विश्वविद्यालयां अर पंचायतां मांय भांत-भांत रा कार्यक्रम राख्या जावेला। ई मौके महिला अर बाल विकास मंत्री अन्नपूर्णा देवी कह्यो के सरकार साल 2030 ताई देश मांय बाळपणा मांय ब्याह री रीत जड़ ऊं खत्म करणो तय कीनो है। वे कह्यो के समाज, समुदायां अर जनता री भागीदारी ऊं देश बाल विवाह मुक्त भारत बणबा ओड़ी लगातार आगे चल रह्यो है। ओ अभियान आवता साल 8 मार्च ने अंतर्राष्ट्रीय महिला दिवस रे मौके पूरो व्हेला।

----

बाल विवाह मुक्त भारत अभियान रो एक साल पूरो व्हेवण रे मौके राज्य मांय भांत-भांत रा कार्यक्रम राख्यी ज्यो। पाली मांय 100 दिन रा खास अभियान री सरूआत रे मौके कार्यक्रम राख्यी ज्यो। ई दौरान टाबरियां ने बाळपणा मांय ब्याह री रोकथाम रा बारा मांय जाणकारी दीरीजी अर वां ने बाल विवाह नी करण री सौगंध दिरायी ज्यी। वठे नई दिल्ली मांय व्ह्या राष्ट्रीय कार्यक्रम रो सीधो प्रसारण ई बतायी ज्यो। कोटपूतली-बहरोड़ जिला मांय बाल विवाह रे खिलाफ "हर घर दस्तक" अभियान सरू करी ज्यो। कार्यक्रम रा तैत ई बारा मांय जरूरी जाणकारी दी जा रही है। टाबर-टाबरियां रा ब्याह रा आयोजन री जाणकारी चाइल्ड हेल्पलाइन नम्बर 1098 माथे दी जा सके है।

0000

मुख्यमंत्री भजनलाल शर्मा रो काल फिरोजपुर फीडर ने और बेहतर बणावण रा काम री सरूआत करण रो कार्यक्रम है। राज्य रा पैली वाळा मंत्री राजेंद्र सिंह राठौड़ आ जाणकारी दीनी। वे आज इण री तैयारियां रो जायजो लीनो। राठौड़ बतायो के लारला दो साल मांय केन्द्र अर राज्य सरकार मिल र श्रीगंगानगर अर हनुमानगढ़ जिलां मांय नहरी तंत्र ने मज़बूत बणावण सारू 4 हजार 958 करोड़ रुप्या रो प्रावधान कीनो है। वे कह्यो के 1 लाख 11 हजार हेक्टेयर ऊं बत्ता रकबा मांय खालां री मरम्मत माथे ई 4 सौ 44 करोड़ रुप्या खर्च कर्या जा रह्या है। राठौड़ कह्यो के सरकार कानी ऊं पाणत सारू बत्तो पाणी मुहैया करावण रे कारण ई दफ़ा बुआई रो काम टेमसर पूरो व्ह्यो अर बीजाई रो रकबो बध्यो है।

0000

जल संसाधन मंत्री सुरेश सिंह रावत आज हनुमानगढ़ मांय भाखड़ा नहर परियोजना री श्यामसिंहवाला माईनर ने और बेहतर बणावण रा काम रो निरीक्षण कीनो। मंत्री मौका माथे मौजूद बणाई-चुणाई रा सामान री गुणवत्ता री जांच कीनी अर अहलकारां ने जरूरी हुकम दीना। श्यामसिंहवाला माईनर ने और बेहतर बणावण रो काम करीब साढ़े 29 किलोमीटर रा हलका मांय कर्यो जा रह्यो है, जिण माथे करीब 21 करोड़ रुप्या रो खर्च आवेला। ई काम ऊं ई हलका रा 10 हजार ऊं बत्ता किसानां ने पाणत सारू पाणी मिल सकेला।

0000

मुख्यमंत्री भजनलाल शर्मा कह्यो है के प्रदेश री बरकत मांय प्रवासी राजस्थानियां री भागीदारी तैय करण माथे राज्य सरकार पूरो ध्यान दे रही है। वे आज वीडियो कॉन्फ्रेंस रे मार्फत न्यारा-न्यारा

राज्यां मांय काम कर रह्या राजस्थान मूल रा अहलकारां सागे 10 दिसम्बर ने राख्या जावण वाळा प्रवासी राजस्थानी दिवस रा सिलसिला मांय बात-चीत कर रह्या हा। श्री शर्मा अहलकारां ऊं अनुभव अर मेलजोल ऊं कारोबारियां ने राजस्थान मांय निवेश करण सारू बधावो देवण बाबत् कह्यो। ई दौरान अहलकार ई ई पहल री सराहवणा करता थकां ईज ऑफ डूइंग बिजनेस, निवेश रे मुजब नीतियां अर सैर-सपाटा ने और लुभावणो बणावण सरीखा सुझाव दीना।

0000

विश्वविद्यालयां रा कुलाधिपति हरिभाऊ बागडे कह्यो है के कोशिकीय अर आणविक जीवविज्ञान रा हलका मांय खोजबीन ने भारत री ज्ञान परम्परा रे मुजब विकसित करी जावणी चाहिजे। वे आज जोधपुर मांय जय नारायण व्यास विश्वविद्यालय री ओर ऊं राख्यी ज्यी अंतरराष्ट्रीय संगोष्ठी मांय बोल रह्या हा। श्री बागडे पौधां मांय जान, संवेदना अर जीववैज्ञानिक संरचना ने वैज्ञानिक तरीका ऊं समझण माथे जोर दीनो।

000

केंद्रीय सड़क परिवहन अर राजमार्ग मंत्री नितिन गडकरी कह्यो है के देश मांय बिजली ऊं चालण वाळी गाडियां री बिक्री साल 2030 ताई 20 लाख करोड़ रुप्या रा लेवल ताई पूग जावेला। वे आज लोकसभा मांय प्रश्नकाल रे दौरान पूछी ज्या पूरक सवालां रा जवाब मांय आ जाणकारी दीनी। गडकरी बतायो के देश मांय फिलहाल बिजली उं चालण वाळी 57 लाख गाडियां रजिस्टर्ड हैं।

0000

केंद्र सरकार प्रधानमंत्री ई-बस योजना रा तैत भरतपुर मांय ई-बस सेवा री मंजूरी दे दीनी है। ई रा तैत शहर मांय बेगी ई 20-30 ई-बसां चलायी जावेला। म्हाणा खबरनवीस बतायो के ई योजना ऊं भरतपुर शहर अर आरे-सारे रा 25 गांवां रा लोगां ने सुबीतो मिलेला।

0000

प्रदेश मांय वोटर लिस्टां रा विशेष गहन पुनरीक्षण अभियान रा तैत केई जिला मांय डिजिटाइजेशन रो काम पूरो व्हे ग्यो है। डीग अर पाली जिलां मांय वोट देवण रा हकदार सगळा लोगां रा फॉर्म डिजिटाइज कर दिया ज्या है। डीग रा उप जिला निर्वाचन अधिकारी राजकुमार कस्वां बतायो के न्यारा-न्यारा महकमां रा तालमेल ऊं आ उपलब्धि हासिल करीजी।

----

डीग रा जिला निर्वाचन अधिकारी उत्सव कौशल बतायो के वोट देवण रा हकदार ज्यां लोगां री जाणकारी रो मिलाण नी व्हे सक्यो है वां रो एस.आई.आर. रा आवता दौर मांय पूरी जांच पाछे सत्यापन कर्यो जावेला।

000

राज्य मांय खनिज उत्पादन अर रॉयल्टी ट्रेंड रो नियमित विश्लेषण कर्यो जावेला। खान विभाग रा प्रमुख शासन सचिव टी. रविकान्त आ जाणकारी दीनी। वे बतायो के ई काम सारू सुपरिन्टेंडेंट माइनिंग इंजीनियर हर महीना चार-पांच खानां रा उत्पादन मांय उतार-चढ़ाव री जांच करेला।

0000

राज्य मांय चाल रह्या पांचवां खेलो इंडिया यूनिवर्सिटी गेम्स काल पूरा व्हेला। आं खेलां रा घणखर मुकाबला पूरा व्हे ग्या है। आं खेलां मांय देश रा 222 विश्वविद्यालयां रा 4 हजार 448 खिलाड़ी खेल रह्या है। म्हाणा खबरनवीस बतायो के खेलो इंडिया यूनिवर्सिटी गेम्स मांय आज ई चंडीगढ़ यूनिवर्सिटी रो दबदबो रह्यो।

0000

सवाईमाधोपुर मांय काल **आपकी पूंजी आपका अधिकार** अभियान रा तैत जिला स्तर रो कार्यक्रम राख्यो जावेला। अग्रणी बैंक मैनेजर बतायो के इण रो मकसद ग्राहकां ने वां री बिना दावेदारी वाळी माली संपत्तियां अर जमा रकम री जाणकारी देवणो है। कार्यक्रम मांय बैंक, बीमा अर म्यूचुअल फंड कंपनियां रा नुमाइंदा मौजूद रेहवेला। वे बतायो के जिला रा न्यारा-न्यारा बैंकां मांय करीब 1 लाख 06 हजार खातां मांय 27 करोड़ 16 लाख रुप्या लारला दस साल ऊं जमा है, जिण ने खाताधारक या वां रा पिरवार वाळा दावो पेश कर र हासिल कर सके है। ई सारू केवाईसी रा कागजात ले जावणा व्हेला।

0000

चित्तौड़गढ़ सैनिक स्कूल मांय आज नौसेना दिवस मणायी ज्यो। ई मौके कैडेट्स नौसेना री उपलब्धियां अर देश री हिफाजत मांय वां रा योगदान रा बारा मांय नान्ही फिल्म बतायी ज्यी।

कार्यक्रम मांय खास पावणा मेजर सी श्रीकुमार कैडेत्स ने भारत रा सशस्त्र बलां री वीरता री गाथा  
ऊं सीख लेवण अर देश री सेवा सारू हमेशा तैयार रेहवण बाबत कह्यो। कार्यक्रम मांय स्कूल री  
नेवल विंग रा कैडेत्स ने मानपाना दे र नवाज्यी ज्या।

00000